

Govor predsjedatelja Doma naroda Parlamentarne skupštine BiH Mustafe Pamuka na 4. sastanku parlamenata zemalja sudionica Jadransko - jonske inicijative u okviru sesije "Uloga parlamenata Jadransko - jonske inicijative u stabilizaciji i razvoju Zapadnog Balkana"

Portorož, 10. svibanj 2004.

"Ovom prilikom zahvalio bih se na pozivu za učešće na ovom cijenjenom skupu i izrazio bih zadovoljstvo boravkom u Sloveniji. Na predloženu temu za razgovor «Uloga parlamenata Jadransko - jonske inicijative u stabilizaciji i razvoju Zapadnog Balkana » želim istaći sljedeće.

Parlamenti imaju nezamjenjivu i vodeću ulogu u procesu demokratizacije regije u razvoju odnosa naših zemalja i naroda. Intenziviranje regionalne saradnje je u najvećem interesu naših zemalja i regije.

Smatram, također, da su parlamenti centri demokratskog procesa odlučivanja te da parlamentarnu saradnju treba ojačati na bilateralnom i multilateralnom nivou. Stanje u regionu je znatno povoljnije u odnosu na predhodni period. Tome su sigurno doprinijele demokratske snage na vlasti u svim zemljama regiona, orijentisane ka evropskim integracionim tokovima, vladavini zakona i ekonomskom razvoju regiona, bez kojeg teško da se može postići potpuna demokratizacija i stabilnost regije. Državni parlamenti imaju važnu ulogu u jačanju saradnje između zemalja Inicijative jer oni izražavaju brige svojih naroda, koje predstavljaju.

Opredjeljenje Parlamenta BiH je jačanje svih oblika saradnje u okviru Jadransko – jonske inicijative koju smatram integralnim dijelom procesa ka Evropskim integracijama zemalja regiona. Uloga Parlamenta BiH je velika, kad je u pitanju ulazak BiH u Evropsku Uniju tj. usvajanje standarda Evropske Unije u svim oblastima. Parlament BiH je odlučan u nastojanju za ubrzanje vremenskog roka za proces pristupanja Evropskoj Uniji. Bosna i Hercegovina očekuje da će i ova konferencija na najvišoj parlamentarnoj razini dati snažan doprinos evropskom putu zemalja Zapadnog Balkana koji za BiH nema alternative.

Bosna i Hercegovina sa stanovišta Evropskih integracionih procesa je put za koji se opredjelila i sa kojeg ne namjerava odstupiti. Jasno nam je da za punopravno članstvo u Evropsku Uniju se moraju ispuniti uvjeti i zato se svi mi u Parlamentanoj skupštini trudimo da što je prije moguće, uvedemo evropske standarde. Približavanje BiH evropskim integracijama će doprinijeti stabilizaciji ukupne situacije u BiH i u cijeloj regiji. Daljna saradnja zemalja Zapadnog Balkana i Jadransko-jonske inicijative će omogućiti jačanje saradnje među zemljama regije u brojnim područjima, uključujući naročito parlamentarnu saradnju , kao platformu za unapređenje ka evropskim integracijama". (kraj)